

## AUGLÝSING

34

25. febr.

um viðbótarákvæði við samning við Stóra-Bretland um framsal afbrotamanna,  
frá 31. marz 1873.

Sendiherra Íslands og Danmerkur í London og utanríkismálaráðherra Stóra-Bretlands hafa, með erindum dagsettum 25. nóv. 1937, samkvæmt fyrirlagi ríkisstjórna sinna, orðið ásáttir um, að ákvæðin í samningnum milli Stóra-Bretlands og Danmerkur, frá 31. marz 1873 um framsal afbrotamanna, sem einnig tekur til Íslands, skuli enn fremur gilda fyrir eftirfarandi hluta Brezka Ríkjasambandsins:

Umboðsríkin: Western-Samoa, New Guinea, Nauru, Cameroon, Togoland, Palestina (ásamt Transjordan) og Tanganyika Territory. Brezk verndarríki: Bechuanaland, Gambia, Kenya, Nigeria, Northern Rhodesia, Northern Territories of the Gold Coast, Nyasaland, Sierra Leone, Salomon Islands, Somaliland, Swaziland, Uganda og Zanzibar. Landsvæði er njóta brezkrar verndar: Perak, Selangor, Negri Sembilan, Pahang, Johore, Kedak, Perlis, Kelantan, Trengganu og Brunei.

Auglýsing nr. 56 23. des. 1937, er hér með felld úr gildi.

Þetta er hér með gert almenningi kunnugt.

*Í ríkisstjórn Íslands, 25. febrúar 1938.*

**Haraldur Guðmundsson.**

## LÖG

35

17. marz

um að ágreiningur milli útgerðarmanna botnvörpuskipa og sjómanna  
um kaupkjör skuli lagður í gerð.

Vér Christian hinn Tíundi, af guðs náð konungur Íslands og Danmerkur, Vinda og Gauta, hertogi í Slésvík, Holtsetalandi, Stórmæri, Þéttmerski, Láenborg og Aldinborg,

Gjörum kunnugt: Alþingi hefir fallizt á lög þessi og Vér staðfest þau með samþykki Voru:

## 1. gr.

Í gerð skal lagður ágreiningur sá, sem nú er uppi milli Félags íslenzkra botnvörpuskipaeigenda annarsvegar og hinsvegar Sjómannafélags Reykjavíkur, Sjómannafélags Hafnarfjarðar og Sjómannafélags Patreksfjarðar, um ráðningarkjör á botnvörpuskipum við fiskveiðar í salt og í ís, við síldveiðar og karfaveiðar.

## 2. gr.

Gerðardóminn skipa formaður og fjórir meðdómendur. Skulu þeir nefndir til starfans sem hér segir: Hæstiréttur skipar formann dómsins. Enn fremur tilnefnir hæstiréttur fjóra menn, en af þeim ryðja deiluaðiljar hvor sínum manni. Hina tvo skipar hæstiréttur síðan til að taka sæti í dóminum. Loks tilnefna deiluaðiljar hvor sinn mann í dóminn.

Nú ryðja deiluaðiljar, annarhvor eða báðir, ekki dóminn innan þess tíma, sem dómsformaður tiltekur, og ryður þá dómsmálaráðherra dóminn í þess stað.

35 17. marz Nefni deiluaðiljar, annarhvor eða báðir, ekki mann í dóminn af sinni hálfu innan þess tíma, sem dómsformaður tiltekur, skal hæstiréttur nefna í dóminn í þess stað, og skal hann, eftir því sem við verður komið, tilnefndur þannig, að líklegt megi telja, að hann liti á deiluna frá sama sjónarmiði og dómari tilnefndur af aðiljanum myndi hafa gert.

Nú verður laust sæti í dómnum, og skal þá um tilnefningu manns í það sæti fara svo sem um val þess manns, sem forfallast hefir.

### 3. gr.

Hver lögráður íslenzkur ríkisborgari er skyldur að taka sæti í dómnum samkvæmt löglegri kvaðningu. Dómendur eru í starfi sínu opinberir sýslunarmenn og njóta réttinda og bera skyldur samkvæmt því.

### 4. gr.

Dómsformaður kveður dóminn saman og annast um, að störfum dómsins sé hraðað svo sem verða má. Skyldir eru aðiljar að láta dómnum í té skýrslur og upplýsingar, sem dómurinn kann að æskja og aðiljar geta í té látið, og getur dómurinn kveðið upp úrskurð, þótt annarhvor eða báðir aðiljar mæti ekki. Ráðningarkjör þau, sem dómurinn úrskurðar að gilda skuli milli aðilja, skulu vera bindandi fyrir þá báða á sama hátt og hefðu þau verið ákveðin með samningi þeirra á milli. Kjör þessi skulu gilda til ársloka 1938. Kjörin skulu einnig vera bindandi fyrir þá eigendur íslenzkra botnvörpuskipa, sem ekki eru félagsmenn í Félagi íslenzkra botnvörpuskipaeigenda. Þó er samvinnuútgæð undanskilin.

### 5. gr.

Samningar þeir, sem í gildi voru milli deiluaðilja til ársloka 1937, skulu gilda framvegis til bráðabirgða þangað til úrskurður gerðardómsins fellur. Dómurinn skal ákveða, að ráðningarkjör þau, sem hann úrskurðar, skuli gilda frá ársbyrjun 1938. Dómurinn skal afla sér upplýsinga hjá sáttasemjara ríkisins í vinnudeilum um kröfur og tilboð deiluaðilja. Hvorugum aðilja má dómurinn dæma frekari rétt en hann hefir gert kröfur til fyrir sáttasemjara, þó þannig, að skipverjar sæti ekki lakari kjörum en samkvæmt samningi þeim, er gildi til ársloka 1937.

### 6. gr.

Úrskurður gerðardómsins víkur fyrir löglega gerðum samningi milli deiluaðilja á hvaða tíma sem er.

### 7. gr.

Allur gerðardómskostnaður greiðist úr ríkissjóði.

### 8. gr.

Lög þessi öðlast þegar gildi.

Eftir þessu eiga allir hlutaðeigendur sér að hegða.

*Gjört á Amaliuborg, 17. marz 1938.*

Undir Vor konunglega hönd og innsigli.

Í nafni konungs

**Frederik ríkisarfi.**

(L. S.)

*Hermann Jónasson.*